

*Discurso di prome minister:***“Gobernador no a cumpli cu su promesa di firma dialuna”**

ORANJESTAD - 9 ‘or di anochi e ‘discurso nacional’ di prome minister Mike Eman tocante e conflicto cu Hulanda mester a wordo transmiti. Pero esaki no a sosode. Gobierno si a manda varios relato prome cu e orario aki y den esaki sr. Eman a bisa entre otro cu gobernador no a cumpli cu su promesa pa firma e presupuesto dialuna pasa.

Den un di e relatonan, prome minister Eman ta bisa cu e ta lamenta cu “a pesar di un promesa serio na su persona cu dialuna e lo firma pre-

supuesto 2014, gobernador di Aruba no a cumpli cu e promesa aki. E motibo pa esaki ta mes condenabel cu e echo riba su mes. Un mal uso di poder cu hama nos lo acepta. E diferencianan lo keda existi te ora respet mutuo regresa y autonomia y dignidad di nos pueblo worde respeta”.

Den e otro relatonan cu a wordo manda algo prome cu 9 or pa prensa, e prome minister ta splica e maneho di su gabinete durante e prome cuater aña y tambe di su dos termino di gobernacion. E ta enfatisa tur esfuerso riba tereno di medio ambiente,

e sosten di hendenan conoci manera Martin Luther King III y Richard Branson y e apoyo durante su welga di hamber. E tambe a papia di Aruba su cifranan pa crecimiento economico cu ta miho den Reino y e scogemento pa inverti enbes di corta den tempo di crisis cu a duna su frutanan pa pueblo.

Gobierno a pidi prensa pa no publica e relatonan cu potretnan prome cu 9.30 pero prensa a cuminsa publica caba for di momento cu a ricibi e relato y tambe e audio di e discurso. Pero riba television bandi 10 ‘or ainda nada a wordo transmiti.

Gobernador Hulanda

Mientrastanto gobernador Fredis Refunjol a bay Hulanda pa papia cu gobierno di Reino pa busca un solucion. Riba su Facebook, gobernador a post un potret di ora a topa cu profesor y ex-minister di Husticia di Hulanda, Ernst Hirsch Ballin na Rotterdam pa ‘un bon combersacion tocante e situacion actual’. Diamars prome minister Eman a declara publicamente na su sede cu gobernador a wordo menasa cu prison pa Hulanda si e ta firma e presupuesto di 2014. Bon Dia Aruba a haya confirmacion cu esaki no ta e caso, aunke den teoria e ta



posibel conforme articulo 25c di e Reglement di Gouverneur. Pero Consejo di Ministernan di Reino nunca lo haci un menasa asina, Bon Dia Aruba a wordo informa.

Pa cu e presupuesto 2014 cu segun e ‘quick scan’ no ta sirbi, gobernador tin e opcion awor pa mand’e pa Gobierno di Reino pa desaprobacion, segun articulo 21.

Tambe tin e posibilidad cu gobernador lo firma e presupuesto pero bou di condicion cu ta bin un presupuesto supletorio cu tur e cambionan necesario. Tur ta depende si gobernador tin suficiente confiansa ainda den e gabinete pa ehecuta e cambionan, Bon Dia Aruba a wordo splica. □